

# 1 SAN PEDRO

## *Pedro Toyase'e Si'a Hue'ña Hua Saisicohua'ina*

<sup>1</sup> Yë'ë Pedropi Jesucristo jëjo daoquëpi iye toya ja'hua toyayë, yequë pai yejañare hua saisicohua'ina caquë toyayë: Ponto, Galacia, Capadocia, Asia cui'ne Bitinia pa'icohua'ina. <sup>2</sup> Maija'quëpi mësarute sahuapi. Sahuasicohua'ini Maija'quë joyopi Maija'quë tsecohua'ire nepi, mësarupi Jesucristo cuañeñe de'oye sehuocohua'ipi i tsiepi tsoa tosicohua'i pa'ijajë caquë. Jaje pa'ina, Maija'quëpi de'oye ñacaina, jo'cua de'oye pa'ijë'ë.

## *Ti Pani Huesëyere Utejë Pa'iye*

<sup>3</sup> De'okuëre pa'ni cañu'u, Maija'quëre mai Èjaë Jesucristo pëca ja'quëre, maire ai oi do'ire tijupë coasicohua'ire nesiquëre Jesucristo juni huësi do'ipi. Jaje pa'ina, iye yo'osi do'ipi de'oyere pare utejë pa'iyere payë, mai. <sup>4</sup> Jaje pa'ina, Maija'quë mësarute caquë ma'tëmo de'huacaisi co'amañare ti ne huesë ma'ñere, si'si ne ma'ñere, cui'ne ti me'me tome ma'ñere paja'cohua'i a'ë, mësarui Maija'quë cuasa do'ipi. <sup>5</sup> Jaje pa'ina, mësarute Maija'quëpi i tutupi ñacai pa'iji, mësarupi huasosicohua'i pa'iyere, i ne de'huacaise'ere ti'ajajë caquë. Jare tëji mu'señarepa paja'cohua'i a'ë.

<sup>6</sup> Ja do'ire mësarui ai sihuajë pa'iyë, coa nëhui tëcahuë jaiye neñañe ai yo'oye pa'itojë. <sup>7</sup> Jaje pa'ina, mësarui Maija'quë pa'iji cuasayere ai yo'oyepi neñaquëna, do'i quë'ye etase'epi, toapi neñasi oro do'iyë jerepa seña maca do'i quë'ye

etasipi. Oro cato coa carajaiñe a'ë. Neñañe pa'ina, itire pase'e etase'epi Jesucristore iñosi maca Jesucristore sihuajë de'oquere pa'ni cayere cui'ne ëjaëre pa'ni cayere iñoñe pasipi.

<sup>8</sup> Jesucristore ñama'pë pa'isicohua'ita'a ite ai oiyë, mësaruru. Ite ñama'pë pa'isicohua'ita'a pa'ire paji cuasajë ai de'oyerepa sihuayë, yë'opi ca tì'añe peoyerepa. <sup>9</sup> Sihuajë joñoa huaso cuañoñere tì'asi'i cajë tì'ahuë, mësaruru pa'ire paji cuasa do'ipi.

<sup>10</sup> Maija'quere quëacaicohua'ipi ai tsoe hue'ña mësarute Maija'quë oi coa isi ja'ñere huaso cocare toyacaijëta'a huesëhuë. Jaje pa'ina, iquere caquë'ni cuasajë ai co'ehuë, asa tì'añu'u cajë.

<sup>11</sup> Cristo joyopi Maija'quere quëacaicohua'ire du'ru quëapi, Cristo ai yo'o ja'ñere cui'ne jeteyo'je i ayere ma'tëmo ayere de'oyerepa pa'i ja'ñere quëapi. Jaje quëaquëna, asajë ¿jequë pa'ija'quë a'ni, i? cui'ne ¿je yëhua jaje pa'ija'coa'ni? cajë ai co'ehuë, asañu'u cajë. <sup>12</sup> Jaje co'ejëna, Maija'quëpi iohua'ire quëapi, iye mësaruru quëaye mësaruru tse peoji caquë. Yecohua'i tse a'ë caquë quëapi. Ja cato maini capi. Yure jaje pa'ina, iyere Maija'quë huaso cocare mësarute quëacohua'i quëahuë, ma'tëmo jëjo daosi joyo tutupi yo'oquëna. Iye huaso coca cato huiñaohua'ique ai cuasajë itise'e ña ëa ju'iñë.

### *Maija'quëpi Maire De'ocohua'irepa Pa'iyena Soiye*

<sup>13</sup> Jaje pa'iye sëte mësaruru cuasayere ne de'huajë'ë, cuepese'eje pa'iohua'i pa'ima'pë. Jaje pa'ijëna, mësaruna Jesús ayere iño maca, Maija'quë oi coçaiyepi pa'iji, mësarute. Jare cuasajë pa'ijë'ë. <sup>14</sup> Jaje pa'ina, Maija'quë caye de'oye

sehuocai mamajë sête, Maija'quëre asama'në yëjë pa'ise'ere pa'ima'pë pa'ijë'ë. <sup>15</sup> Maija'quë mësarute soisiquë ai de'oquë api. Jaje pa'ina, mësarujë de'ocohua'irepa pa'ijë'ë, ije pa'iohua'i. <sup>16</sup> Jaje pa'ina, toyase'e caji: “De'ocohua'irepa pa'ijë'ë, yë'ëje pa'iohua'irepa.”

<sup>17</sup> Mësarupi Maija'quëre “Ja'quë” cajë secohua'i pani si'anë ini ca'rajë pa'ijë'ë, iye yeja mësarupa'i mu'seña pai ñape yo'ose'ëje pa'ye saiquëni, cui'ne si'a yë'quë maca si'aohua'ire yo'oquëni. <sup>18</sup> Mësarute Maija'quëpi huasopi, mësaruaiohua'i pa'ise'ëje pa'ye mësarujë do'i peoyere yo'ojë pa'isicohua'ini. Mësarute huasoni saicaima'ë paji'i, oropi panita'a curipi, ne huesëyere. Iye huaso do'i cato saipi, ti ne huesë ma'ñere papi. Jare mësarupi tsoe asacohua'i a'ë. <sup>19</sup> Cristo tsie do'ipi saicaji'i, mësarute yëi ñama a'si peoquëpi, si'si te'ñaje peoquëje pa'ire papi. <sup>20</sup> Cristo cato ja yë'ta'a yeja de'huama'në jaje jucacaija'quëre ca nëosiquë pa'iji. Jaje pa'ipi yure tëji mu'seña mësarude'oye pa'iyere caquë daji'i. <sup>21</sup> Jaje pa'ina, mësarucristo do'ija'a Maija'quëre ire papi cuasajë sehuoyë, ju'isiquëni huajëquëre huëoni de'oquëre pare iñosiquëre. Jaje pa'ina, yure mësarumaija'quë pa'ire paji cuasajë ina quëco pajë pa'iyë, cocaija'quë api cuasajë.

<sup>22</sup> Nuñerepa cocare mësarusehuocai do'ire mësarujoa tsoa tohuë, Maija'quë do'ijëre nuñerepa oñu'u cajë. Jaje pa'iye sête si'a tuturepa pai ñape yecohua'ire oiye pa'iji, de'o joyore papi. <sup>23</sup> Jaje pa'ina, mësarucato yure pai ju'icohua'i mamajë peoyë. Mësarucato yure Maija'quë coca

ti pani huesëyere papi jojosicohua'i a'ë. <sup>24</sup> Jaje pa'ina, toyase'e caji:

Si'a pai iye yeja pa'icohua'i tayaje pa'iohua'i a'ë,  
Si'aye iohua'i pa'iyepi taya joroje pa'ye a'ë.

Taya cato cuenecoa. Cuene huesëcona, iti joropi tomecoa.

<sup>25</sup> Jaje pa'iquëta'are Maija'quë coca cato ti pani huesëye a'ë.

Iye huaso cocare mësarute quëahuë.

## 2

<sup>1</sup> Jaje pa'iyë sëte si'aye co'ayere jeocojë'ë, si'aye cosoyere, coa cayere, yecohua'i payere ëa ñañere, cui'ne yecohua'ire co'a coca cayere jeocojë'ë.

<sup>2</sup> Jeoconi tsi mañaja'a coasicohua'i oje yëyeje pa'ye mësarujë joyo pa'i cocare yëjë'ë, huasosicohua'i ai de'oyere cajë. <sup>3</sup> Mësarupi Èjaë de'oquërepa pa'iyere nuñerepa ña ti'asicohua'i pani jaje yëcohua'i pa'ijë'ë.

### *Cristo Api, Pa'iyë Quë'i Quëna Pë*

<sup>4</sup> Èjaëna tsio daijë'ë, pa'iyë pa'i quëna pëna, pai jeocosicona. Jaje pa'iquëta'are Maija'quëre cato i sahuasi quëna përe pa'ë, jai do'i quë'io.

<sup>5</sup> Jaje pa'ina, mësarü ina tsiojaijë pa'iyë quë'i quëna pëa de'ohuë. De'orena, Maija'quëpi joyo huë'e de'huapi, mësarupi. De'huaëna, ise'ere necaija'cohua'i pa'iyë. Pa'ijë Jesucristo do'ija'a ai yo'ojë isiyë, Maija'quë sihuaquë ñañere. <sup>6</sup> Jaje pa'ina, toyase'e caji:

Yë'ë sahuasicore pani, de'o quëna përe pare Siónna oañë,

Iona quëco paquë cato coa quëco tayohuë caquë  
co'a ju'ĩne pasipi.

<sup>7</sup> Jaje pa'ina, ja quëna përe iore pao cajë asaco-  
hua'ire cato do'i quë'iorepa asa cuañoji. Jaje  
pa'iquëta'are, toyase'e cayeje pa'ye pa'iji, jaje  
asama'cohua'ire cato. Jaje pa'ina, caji, toyase'e  
ñeje:

Huë'e necohua'i jeocosi quëna pëpi  
Yure cato si'a huë'e naupa quëna përepa de'o.

<sup>8</sup> Cui'ne yecopi caji, ñeje:

Asama'cohua'ipi ja quëna pëna ju'ajëna, iopi ne  
taoja'coa.

Jaje pa'ina, jaohua'i cato Maija'quë coca sehuoma'  
do'ire ne huesëja'cohua'i a'ë, i ña nëose'eje pa'ye.

### *Maija'quë Pai Pa'iyë*

<sup>9</sup> Mësarü cato i sahuasi pai a'ë. Ëjaëre pase'ere  
necaija'a pai a'ë. Si'si peo daripë acohua'i  
a'ë. Maija'quë tsecohua'ire pa'ë. Jaje mësarü  
pa'iohua'i a'ë. Jaje pa'ina, mësarute nea hue'ñare  
pa'ijëna, Maija'quëpi soipi, mia hue'ñana etani  
Maija'quë de'oyerepa yo'ose'ere yecohua'ina  
quëajajë caquë. <sup>10</sup> Ja'në cato mësarü i pai  
peocohua'i pa'ë. Pa'isicohua'ipi yure cato i  
pai de'ohuë. Ja'në mësarute Maija'quë teaye ñani  
cöcaiye papi. Yure cato mësarute teaye ñaquë oi  
cöcaiji.

### *Maija'quëre Necaiyere Cajë Pa'ijë'ë*

<sup>11</sup> Maija'quë do'ijë, mësarute señë, mësarü capë  
yëyere sa'ro nëocaima'pë pa'ijë'ë caquë, mai  
joñoa sañope uihuayere. Mësarü cato iye yeja  
acohua'i peoyë. Coa daisicohua'i a'ë. <sup>12</sup> Jaje  
pa'ina, de'oyerepa yo'ojë pa'ijë'ë, si'aohua'ire

judío paí peocohua'ireje. Jaje mēsaruپی pa'ijēna, yure mēsarute sañope co'aye yo'ocohua'i a'ë casicohua'ipi mēsaru de'oye yo'oyere ñani, Maija'quēre de'oquēre papi caja'cohua'i a'ë, johua'ire Maija'quē huaso mu'se tī'aēna.

<sup>13-14</sup> De'oji. Maija'quēpi nepi, paí ëjaohua'ire co'aye yo'ocohua'ire si'seja'cohua'ire, de'oye yo'ocohua'ini de'ocohua'i a'ë caja'cohua'ire. Jaje pa'ina, mai Ējaēre oi do'ire si'a paí ëjaēre si'aohua'i jerepa pa'ire sēte de'oye sehuocaiye pa'iji. Jaje cui'ne si'aohua'ire iye yeja paí ëjaohua'ire de'oye sehuocaiye pa'iji. <sup>15</sup> Jaje pa'ina, Maija'quē cato yēji, mēsaruپی de'oye yo'ojē pa'ijēna, huesēohua'ipi ta'ñe cuasama'cohua'ipi mēsarute sañope ca tī'añe peoyere.

<sup>16</sup> Jo'ya nesicohua'i peoyē, mēsaru. Jaje pa'ina, jo'ya nesicohua'i peoyē cajē co'ayere neñu'u cajē yo'oma'pē pa'ijē'ë. Coa ai jerepa Diusu jo'yaohua'i a'ë cuasajē, i yēyere yo'ojē pa'ijē'ë. <sup>17</sup> Si'aohua'ire paire de'oye yo'ojē'ë, ëjaohua'ire yo'oyeje pa'ye. Maija'quē do'ijēre oijē'ë. Maija'quēre ca'rajē'ë. Paí ëjaēreje de'oye yo'ojē'ë, ëjaēre papi cuasajē.

### *Cristo Mai Yo'o Ja'ñere Iñoquē Ai Yo'opi*

<sup>18</sup> Co'amaña necaicohua'i, mēsaru ëjaohua'ire de'oye sehuocaijē pa'ijē'ë. De'ocohua'ise'ere mēsarute oicohua'ise'ere de'oye yo'oma'pē pa'ijē'ë. Co'a ëjaohua'ireje de'oye sehuojē yo'ojē'ë. <sup>19</sup> Jaje pa'ina, de'oye a'ë, mēsaru de'oye yo'ojēta'are mēsarute yecohua'ipi co'aye yo'ojēna, ai yo'oyere quēcoye. <sup>20</sup> Jaje pa'iquēta'are mēsaruپی co'aye yo'ojē si'se cuañojē quēcoto do'i peoji. Jaje pa'iquēta'are mēsaru de'oye yo'o do'ire ai yo'ojē

quēcoye pani de'oye a'ë. Do'i pa'iji, Maija'quë ña hue'ña. <sup>21</sup> Jare caquë mësarute Diusu soipi, mësarupi Cristo mësaru do'ire ai yo'ose'ere ñani i yo'ose'eje pa'ye mësaruje yo'ojajë caquë. <sup>22</sup> Cristo cato ti te'oreje tayo neñe paquë paji'i, cui'ne paireje cosoma'quë paji'i. <sup>23</sup> Ite co'aye catoje sañope cui'ne co'ayepi cama'quë paji'i. A'si ite yo'o macaje sañope icohua'ire saisi'i cama'quë paji'i. Coa ai jerepa Maija'quëna jeopi, jaëpi pai yo'oyere ña de'huaquëpi, nuñerepa yo'oquëpi ña de'huajaquë caquë. <sup>24</sup> Cristopi si'aye mai co'aye yo'oye hue'oni sani cruzuna que cuañoopi, maipi co'aye yo'oyere ju'isicohua'ije pa'ye pa'ijë nuñerepa yo'oyere huajëcohua'i pa'ijajë caquë. I a'si do'ipi mësaru huasosicohua'i pa'iyë. <sup>25</sup> Ja'në mësaru yëi ñama ne huesësicohua'ije pa'iohua'ipi paë'ë. Jaje pa'isicohua'ita'a yure cato Cristona co'irena, ipi yëi ñamare ñacaiquë ñañeje ñaquë mësaru joñoaje ñacaiji.

### 3

#### *Huejasicohua'i Pa'iyere Quëaye*

<sup>1-2</sup> Nomiohua'i, mësaruje mësaru ëjëohua'i cuañeñere de'oye sehuojë pa'ijë'ë. Jaje yo'ojëna, mësaru ëjëohua'i sehuoma'cohua'ipi mësaru iohua'ire de'oye ëjaohua'ire ñajë de'oye pa'iyere ñajë sehuoja'cohua'i a'ë, ai yëhuo coca peoye. <sup>3</sup> Mësaru de'ocohua'i ña cuañoñere ëmëje'e capë ëja de'oyere oima'pë pa'ijë'ë, ai de'oye naña yoyere, jai do'i yi'yo se'huoñere, panita'a jai do'i caña suñañere. <sup>4</sup> Mësaru de'ocohua'i pa'iyë cato pa'ijaquë mësaru joyopi de'oye cuasayepi, ja'ë

tënë ma'ñerepa, a'ji joyopi jo'cua de'oye pa'iyē a'ē, do'i quē'yerepa Maija'quē ña hue'ña. <sup>5</sup> Ai tsoe hue'ña nomiohua'i Maija'quēna iohua'i pa'iyē isisicohua'i cato jaje pa'iyepi ēja de'osicohua'i pa'ahuē'ē. Maija'quēna quēco pacohua'i pa'ahuē'ē. Jaohua'i cato, jaje pa'iohua'ipi iohua'i ējēohua'ire de'oye sehuocohua'i pa'ahuē'ē. <sup>6</sup> Jaje pa'io pa'aco'ē, Zara. Jaje pa'ioipi io paquē Abrahamre de'oye sehuoco pacopi ca'aco'ē, “Yē'ē ējaē”. Jaje pa'ina, mēsaruپی ti ca'rama'pē de'oye yo'ocohua'i pani io mamajē pa'iyē.

<sup>7</sup> Jaje cui'ne mēsaruپی ējēohua'ijē mēsaru nējohua'i yējē cayere de'oye asacohua'i pa'ijē'ē. Pani nomiohua'ipi esa jē'ye duruhuējē pa'iohua'i pa'i do'ire iohua'ire ējaohua'ire ñajē dahuēre paye. Coa ai jerepa Maija'quē oi mēsarute pa'iyē isise'ejē pa'ye jaohua'irejē isisi do'ire mēsaru de'oye ñajē pajē'ē. Jaje yo'ojēna, mēsarute jōsa ta'tēpojē pa'io pa'iyē pasipi, Maija'quēre sē maca.

### *De'oyere Pare Yo'o Do'ire Ai Yo'ocohua'i Pa'iyē*

<sup>8</sup> Jaje pa'ito pai ñape sa'ñe de'oye yo'ojē pa'ijē'ē, te'e nēiñena tsiosicohua'ipi sa'ñe Maija'quē do'ijēre oijē. Teaye pa'iohua'ipi de'oye yecohua'ire oijē cōcaicohua'i pa'ijē'ē. <sup>9</sup> Mēsarute co'aye yo'ouna, itejē co'ayepi saima'cohua'i pa'ijē'ē, pēi tea ju'iquēna. Itejē pēijē sañope tea ju'iñepi saima'pē pa'ijē'ē. Coa ai jerepa mēsarute sañope cacohua'ini de'oyepi cacaijē'ē, Maija'quēpi de'oye pa'iyena de'huaja'cohua'ini soisicohua'i sēte. <sup>10</sup> Jaje pa'ina:

Paipi sihuaquē de'o mu'seña pasi'i cani  
I tsemeñore nau nēcōye pa'iji,



Coso coca caye paja'core yë'opopi.

<sup>11</sup> Co'aye yo'oyere jëoconi de'oyere yo'ojë pa'ijë'ë. Jo'cua de'oye pa'iyere co'eni t̄l'ani jare yo'oye pa'iji.

<sup>12</sup> Ējaëpi nuiñe pa'icohua'ire ñacai paji.

Cui'ne iohua'i ite señeje asacai pa'iji.

Jaje pa'iquëta'are co'aye yo'ocohua'ire cato sañope yo'oquë pa'iji.

<sup>13</sup> ¿Nepi mësarute sañope yo'oja'cohua'i a'ni, mësarupi si'anë de'oyese'e yo'ocohua'i pa'ito?

<sup>14</sup> Jaje pa'iquëta'are mësaruni nuñerepa yo'ojë pa'i do'ire ai yo'oni sihuacohua'i pa'ija'cohua'i a'ë. Ca'rama'pë pa'ijë'ë. Cui'ne co'a ju'ima'pë pa'ijë'ë.

<sup>15</sup> Coa ai jerepa Cristore mësaruni joñoa Ējaëre pare pajë'ë. Jaje pa'ina, si'anë cuañesicohua'ipi pa'ijë'ë, mësaruni sehuoni utejë pa'iyere paipi seni asañu'u cajë secohua'ire, dahuëre pa'iohua'ipi, ëjaohua'ire ñajë de'oyere papi iohua'i sese'ere sehuocaijë'ë.

<sup>16</sup> Jaje pa'ina, mësaruni cuasayepi jo'cua pa'ijaquë cani de'oye yo'ojë pa'ijë'ë. Pa'ijëna, mësaruni nuñe Cristore sehuocohua'ie äaye pa'iyere co'aye cacohua'ipi iohua'ie co'aye case'ere cuasajë co'a ju'ija'cohua'ie a'ë. <sup>17</sup> Ai jerepa de'oji, nuñere pare yo'ojë ai yo'oye pa'ito. Jaje Maija'quëpi yë nëoru. Co'ayere yo'o do'ire ai yo'oye cato do'i peoye a'ë.

<sup>18</sup> Mai co'aye yo'o do'ire saicai Cristo ai yo'opi, te'ore pare juni tējiquë. De'oquëpi ai yo'opi, mai co'acohua'ie do'ire, maini Maija'quë quë'rona sasi'ie caquë. I capë cato huahuoni ju'isiquë paji'ie. Jaje pa'isiquëta'a i joyopi huëoquëna, cui'naëpi huajëquë pani copi. <sup>19</sup> Ja joyopi sani paire necaise'ere quëapi, tseä cuañosi joñoare. <sup>20</sup> Ja joñoa

cato tsoe hue'ña Noé pa'inë Maija'quëre sehuo-  
caima'cohua'i pa'ijë pa'isicohua'i paë'ë. Jai yohuë  
de'hua maca Maija'quë yo'o jujama'ë iohua'ire  
utequë pa'i maca ja joñoare quëapi. Coa ocho pai  
maña huaso cuañojë pa'ahuë'ë, ocopi. <sup>21</sup> Maire oco  
doye cato ocho paire huasose'eje pa'ye a'ë. Jaje  
pa'ina, Jesucristo juni huëisi do'ipi maire huasoji.  
Oco doye cato coa iñoñe a'ë, ja huasosicohua'i  
pa'iyere. Jaje pa'ina, emëje'e si'sire tsoa toñere oco  
doye iñoñe paji. Coa ai jerepa de'oye cuasayere  
pañu'u cajë Maija'quëre señere iñoji. <sup>22</sup> Maire hua-  
soquë cato ma'tëmona mëni Maija'quë ëja te'tere  
pa'iji, si'aohua'ire huiñaohua'ire cui'ne cuañe tutu  
pacohua'ire meñe cuañequëpi.

## 4

### *Diusu Isisi Tutu Pa'iyë Ja'ye Ñacajë Pa'iyë*

<sup>1-2</sup> Cristopi i capë ai yo'oquë juji'i. Jaje pa'ina,  
iye cuasayere pajë'ë. Capëpi ju'isiquë cato co'aye  
yo'oye tëni saisiquë api. Tëni saisiquëpi si'a i  
iye yeja pa'i maca Maija'quë yëyere yo'oquë  
pasipi, i capë co'aye yëyere yo'oma'ë, jare  
cuasajë pa'ijë'ë. <sup>3</sup> Teape tsoe mësarü Maija'quëre  
sehuoma'cohua'i yo'oyere yo'ojë paë'ë, si'aye  
yo'oyena sëo measicohua'ipi, co'ayere yëyere,  
cuepeyere, jai pai tsi'sini aijë ai pisiye yo'ojë  
cayere, jaiye cõno ucuyere, cui'ne Maija'quë api  
cajë co'ayere sejë yo'ojë paë'ë. <sup>4</sup> Jaohua'i cato yure  
mësarute tìohua'ire ñañë, mësarupi te'e iohua'i  
ja're cõni co'ayere yo'ojë pa'ima'pëna. Jaje pa'ina,  
mësarute co'aye cayë. <sup>5</sup> Jaje pa'iquëta'are jaohua'i  
cato iohua'i pai ñape yo'ose'ere iñoja'cohua'i a'ë,

huajëcohua'ire cui'ne ju'isicohua'ire pai ñape yo'ose'ere saisi'i caquë ña de'huaquëna. <sup>6</sup> Jaje pa'ina, ju'isicohua'ire de'o cocare quëapi. Ja cocapi iohua'i huajëcohua'i pa'inë yo'ose'ere ña de'huayere caquë, iohua'i Diosu pa'iyë isiyepi joyopi pa'ijajë caquë yo'opi.

<sup>7</sup> Si'a co'amaña carajai mu'seña ti'aji. Jaje pa'ina, mësarü nuñerepa pa'iohua'ipi Maija'quëre señese'e yo'ojë pa'ijë'ë. <sup>8</sup> Jaje pa'ina, si'aye jerepa pai ñape sa'ñe oiyere pajë'ë. Paire oiye cato jaiye co'aye yo'oyere sai de'huacaiye a'ë. <sup>9</sup> Pai ñape yecohua'ire de'oye yo'ojë'ë, mësarü huë'ena daicohua'ire, ësema'pë. <sup>10</sup> Jaiye tiñe pa'ye Maija'quë isiye de'o co'amaña de'oyerepa necaicohua'i sëte pai ñape yecohua'ire necaijë'ë, mësarü isi cuãnose'eje pa'ye. <sup>11</sup> Mësarü joyopi cocare caquë pani Maija'quë coca cayeje pa'ye cajaquë, cui'ne yecohua'ini cocaiquë pani Maija'quë isi tutupi cocaijaquë. Jaje pa'ina, si'aye mësarü nerojaiñe cato Jesucristo do'ija'a, Maija'quëre sihuajë de'oquëre pa'ni ca ja'ñere neñe pa'ijaquë. Maija'quëre cato si'a miañe jare i tse'se'e a'ë, cui'ne si'a co'amaña jare i tse'se'e a'ë, je'nëna. Jaje pa'ijaquë.

### *Cristore Tuicohua'i Ai Yo'oye*

<sup>12</sup> Yë'ë oicohua'i, toa ëoyeje pa'ye jëaye neñañepi mësaruna titaja'coa. Titacona, me neni jaje tiñerepa pa'iquë'ni cuasama'pë pa'ijë'ë. <sup>13</sup> Neñañepi pa'ito coa ai jerepa sihuajë'ë, Cristo ai yo'ose'e ayere mësarüje pajë cajë, si'aye i ayere de'oyerepa mësarüja'a iñoquëna, ai sihuaja'cohua'ipi. <sup>14</sup> Jaje pa'ina, yecohua'ipi Cristore tui do'ire mësarute

co'acohua'i a'ë cato mësaru sihuacohua'i pa'iye pa'iji, Maija'quë de'o joyopi mësaru ja're pa'i do'ire. <sup>15</sup> Paire huani jeoñere, co'amaña yahue iñere, co'aye yo'oyere, yecohua'i yo'oyere coa cacarojaijë ne de'huacaiyere yo'oye peoji, iyere yo'o do'ire ai yo'oquë pani huajëya' ju'iñe pa'iji. <sup>16</sup> Jaje pa'iquëta'are Cristore tui do'ire ai yo'oquë pani huajëya' ju'iñe peoji. Coa ai jerepa Maija'quëni de'oquëre pa'ni caquë sihuaye pa'iji, ai yo'o do'ire.

<sup>17</sup> Tsoe ti'api, Maija'quë tsëcapëre pani iohua'i yo'ose'e ñaquë sai de'hua maca. Jaje mai yo'ose'ere du'ru ñaquë sai de'huaye huëoto, ¿merepa jaohua'i Maija'quë caye sehuoma'cohua'i yo'o cuañoja'cohua'i a'ni, ai co'acohua'i cui'ne Maija'quë cuañeñe yo'oma'pë tayocohua'i? <sup>18</sup> Nuñe yo'ocohua'ita'a huaso cuañoñe ai yo'oye pa'iji. Jaje pa'ito, ¿merepa co'aye yo'ocohua'i cui'ne tayocohua'i jëa ti'aja'cohua'i a'ni? <sup>19</sup> Jaje pa'ina, Maija'quë yëyepi yo'ojë ai yo'ocohua'i cato jare de'oyere yo'ojë pa'iye pa'iji, joñoase'ere Maija'quëna isini pa'ijë, Maija'quë cato maire ne de'huaquëpi, cui'ne i case'eje yo'o ti'acquëpi.

## 5

### *Sehuosicohua'ire Yëhuoye*

<sup>1</sup> Yë'ëje sehuosicohua'i ëjaë'ë. Jaje pa'ipi Jesucristo ai yo'oquëna, ñasiquëpi yure yëhuoyë, sehuosicohua'i ëjaohua'ire, mësaru quë'ro pa'icohua'ire, yë'ëje iohua'i ja're coní Jesús aye de'oyere pare jeteyo'je paja'quëpi. <sup>2</sup> Mësarupi ñacaija'cohua'i a'ë caquë Maija'quë mësaruna isisicohua'i de'oye cuasajë yo'ojë'ë, Maija'quë

yēyeje pa'ye. Yo'oma'pē pa'ijē'ē, cuañe nēosi do'ire panita'a curiquēre ai yē do'ipi mēsaru yē do'ire sihuajē nejē'ē, co'amaña. <sup>3</sup> Cui'ne mēsaru tsecohua'i a'ē cuasama'pē pa'ijē'ē, mēsaru ñajē pacohua'ire. Coa ai jerepa iohua'ini de'oye pani iñojē'ē, mēsaru pa'iyere ñajē tuija'cohua'ire. <sup>4</sup> Jaje mēsaru yo'onita'a yēi ñamare ñacaicohua'i Ējaērepa dai maca de'o marore pare isi cuañoja'cohua'i a'ē, ti me'me tomema'coni, cui'ne i ayere de'oyere pare iñoja'coni.

<sup>5</sup> Jaje cui'ne mēsaruje posēohua'ije sehuosicohua'i Ējaohua'i cayere de'oye sehuocohua'i pa'ijē'ē. Si'aohua'i pa'i ñape yecohua'ire de'oye sehuocaijē dahuēre pa'ijē'ē. Jaje pa'iyē pacohua'ire cato Diusupi sañope yo'oquē api, jerepa pa'iohua'i a'ē cuasacohua'ire. Jaje pa'iquēta'are dahuēre pa'icohua'ire cato de'oye yo'oquē i oiyepi cōcaiquē api. <sup>6</sup> Jaje pa'iyē sēte Maija'quē tutu quē'i Ējaēre pa'ē cuasajē i cuañeñere sehuojē dahuēre pa'ijē'ē, ipi mēsarute jerepa tēto saisicohua'ire neja'quēre iti yo'o maca tī'aēna. <sup>7</sup> Jaje pa'ina, si'aye mēsaru co'a ju'iñe Maija'quēna isijē'ē, mēsarute oi ñacaiquēna.

<sup>8</sup> Ñare pajē pa'ijē'ē, sētasicohua'ipi. Mēsarute sañope yo'oquē huati, jai yaije pa'ipi tē'ijai mēsarute co'equē cu'iji, asi'i caquē. <sup>9</sup> Sañope ite quēco saojē'ē, Maija'quē pa'iji nuñerepa cuasayepi. Si'a hue'ña Maija'quē do'ijē pa'icohua'ije cui'ne ai yo'oye pa'iquēta'are quēcōyē cuasajē mēsaruje quēcōjē'ē. <sup>10</sup> Jaje coa nēhui tēcahuē ai yo'osi jeteyo'je Diusupi mēsarute de'ocohua'ire nuñerepa pa'iohua'ire tutu quē'iohua'ire, cui'ne

tì'aja'cohua'ire pa'ë asacohua'ire nesipi, maire ai oi Jesucristo ja're tsioni pa'ijë ti carajajì ma'ñere de'oyere pare pajajë caquë soisiquëpi. <sup>11</sup> Jaë api, jerepa pa'i de'oquërepa ti carajajìma'quërepa. Jajë pa'ijaquë.

*Pëpa Tëjijerepa*

<sup>12</sup> Maija'quë do'iquë nuñe pa'iquë Silvanona toya cuañohuë, iye nëhui coca maña. Iye toyase'e cato mësarute yëhuoye a'ë, cui'ne care paye a'ë, Maija'quë maire oi coa isise'ere. Jajë pa'ito ocue pa'i macarepa itire tuijë pa'ijë'ë.

<sup>13</sup> Babilonia sehuosicohua'i pa'icohua'ipi mësarute pëpa saoyë, mësarute soise'eje pa'ye Diosu soisicohua'ipi, cui'ne yë'ë mamaquëje pa'i Marcosje mësarute pëpa saoji. <sup>14</sup> Pai ñape yecohua'ire yo'jeire oiyepi oijë su'cuajë sihuajë pëpacajë'ë.

Si'aohua'i Jesucristore pacacaicohua'i sëte, ipi ñacaina, jo'cua de'oye pa'ijë'ë. Jajë pa'ijaquë.

## **Maija'quë Huajë Ca Nëose'e New Testament in Secoya (EC:sey:Secoya)**

copyright © 2012 Wycliffe Bible Translators, Inc.

Language: Secoya

Translation by: Wycliffe Bible Translators, Inc.

Secoya [sey], Ecuador

### **Copyright Information**

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Secoya

**© 2012, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 11 Nov 2022 from source files  
dated 29 Jan 2022

995e68c5-fe57-54e6-bf8e-0637526d3f7d